

# 天台宗義略說

---

佛學叢書

(要彙)

卷九

---

上海佛學書局印行

佛學  
小叢書

# 天台宗教義略說

梅光羲

今略說天台宗教義約以六門分別一者歷史二者教判三者教理四者觀行五者行位六者身土

一歷史者本宗之所以名爲天台宗者以本宗初祖智者大師智顓居天台山故取此以立宗名然依今師相承而言則應以龍樹爲初祖慧文爲二祖南岳爲三祖天台爲四祖蓋龍樹所著大智度論及中論爲本宗教義之基礎慧文依智論立一心三觀以授南岳慧思南岳慧思依中論三諦之偈妙領心府發深定慧三昧

成就。觀解圓明。遂授天台智者大師。故序今師之相承。應如此序列之也。而通途復以智者大師爲初祖者。則以廣立教時具判一代。實由此祖創始故也。此宗雖爲中國所創立。然其所依之經論。則皆西來者。所謂法華經。中論。涅槃經。大品般若經。大智度論等。固皆西來之大乘經論也。

二教判者。復分爲二。一者五時。二者八教。

五時者。智者大師以如來所說一代聖教判爲五時也。一華嚴時。華嚴者。經名也。時者。謂初說此經如日照高山之時也。蓋如來初爲大乘根熟者首談此經。唯是無盡法界。性海圓融。空有齊彰。色

心俱入。但化大乘菩薩。是名華嚴時也。二鹿苑時。鹿苑卽鹿野苑。是如來說阿含經之處也。時者。謂次說此經如日照幽谷之時也。蓋如來爲小乘於前大法不見不聞猶如聾瞽。於是寢大化而施小化。故於鹿苑之中說四諦法。演四阿含等經。是名鹿苑時也。三方等衆機普被。曰方。四教並談。曰等。時者。謂次說方等諸經。如日照平地之時也。蓋由前鹿苑中說小乘法。二乘之人得少爲足。便謂究竟。故假維摩居士以呵斥之。使其恥小慕大。故說維摩楞伽等經。是名方等時也。四般若時。梵語般若。華言智慧。時者。謂次說此經如日照禺中之時也。蓋由小乘旣被彈呵。同心向大。然其執

情未能頓泯。由是廣談般若空慧之法而淘汰之。說大品般若經等。是名般若時也。五法華涅槃時。法華涅槃二經名也。時者謂正說此經如日輪當午之時也。蓋如來於前四時調機純熟。故於靈山會上稱性而談。令其會權歸實。了妄卽真。演長遠之壽量。顯至道之幽微。上中下根咸蒙授記。此法華一經所以說也。猶有餘機未盡。故更說涅槃一經。是名法華涅槃時。此卽五時是也。

八教者。化儀四教。化法四教也。化儀四教者。謂佛化衆生之儀式。有其四種也。一頓教。謂不談小乘直說大法。故名頓教也。二漸教。漸卽漸次。自淺至深。次第而進。故名漸教也。三祕密教。謂如來不

可思議智慧神通之力。能令大衆同會聽法。所聞各異。彼不知此。此不知彼。隱密赴機。故名祕密教也。四不定教。謂如來不可思議智慧神通之力。能令聽法之衆。或聞小法而證大果。或聞大法而證小果。彼此相知。得益不定。故名不定教也。此卽化儀四教也。化法四教者。謂佛化衆生之法門。有其四種也。一藏教。謂說生滅四諦教化小乘者也。二通教。說無生四諦。通前藏教。通後別圓。大小乘機皆可通被者也。三別教。別者隔別也。獨對菩薩說無量四諦。非是二乘之所能修。是謂別前藏通。然其所說之法門。有隔歷次第而不圓融。故又別後圓教。所以名爲別教矣。四圓教。圓者不偏。

之謂也。謂此教所詮無作四諦。性相圓融。事理無礙故也。

三教理者。本宗教理。雖有多門。然其最精要者。則一念三千之義也。今且略言之。謂一切衆生性中悉皆具足十法界也。十法界者。一地獄界。二餓鬼界。三畜生界。四阿修羅界。五人界。六天界。七聲聞界。八緣覺界。九菩薩界。十佛界。此十界之中。各各有其如是相。如是性。如是體。如是力。如是作。如是因。如是緣。如是果。如是報。如是本末究竟等。此十如是。應分別釋之。一者通釋。二者別釋。通釋者。相者相貌也。謂十界相貌各各不同。如水有水相。火有火相。乃至人之面貌各各不同是也。性者性分。謂薰習所成改變不易者。

也。前所言相。是據外而言。今所言性。則據內而言也。體者體質。謂十界各有其身心。此身心卽其體質也。力者力用也。謂十界各有其力用。如王力士千萬技能是也。作者造作。謂十界皆有運爲造作。卽身口之造作是也。因卽習因。謂前之所作可爲後種。前所作者卽名爲因也。善人習善而益善。惡人習惡而益惡者。卽此故也。作與因不同者。蓋作是約外色言。而因則約內心言也。緣謂助緣。譬如穀之生芽。須藉雨露日光等。此雨露日光等卽是助緣也。果者結果。卽從因而得之果也。如過去世習作惡事。則今生卽得惡道之身是也。報者。謂過去世作惡作善。則今生身心受其苦樂之



報也。本末究竟等者。謂初相爲本。後報爲末。所歸趣處爲究竟等也。別釋者。束十界爲四類。地獄餓鬼畜生爲一類。此類名爲三惡道類。人天阿修羅爲一類。此類名爲三善道類。聲聞緣覺爲一類。此類名爲二乘類。菩薩佛爲一類。此類名爲菩薩佛類。三惡道以表苦爲相。習惡爲性。麤惡身心爲體。登刀入鑊爲力。起惡爲作。貪瞋等爲因。愛取爲緣。地獄之身爲果。銅柱鐵床之苦爲報。相如是。乃至報如是爲本末究竟等。三善道以表樂爲相。習善爲性。上升色心爲體。樂受爲力。起五戒十善爲作。善業爲因。善愛取爲緣。人天等之身爲果。人天等福報爲報。本末究竟等如前說。二乘以表

無餘涅槃爲相。解脫爲性。法身爲體。無繫爲力。三十七道品爲作。無漏慧行爲因。戒行爲緣。四果爲果。不受後有故無報。本末究竟等如前說。菩薩佛以外修萬行爲相。內生眞智爲性。眞如自性爲體。四弘誓願爲力。六度爲作。智慧莊嚴爲因。福德莊嚴爲緣。無上正覺爲果。大涅槃爲報。本末究竟等如前說。此之十界。一切衆生性中悉皆有之。但有理具與事造之別。理具者。一念頓具也。事造者。隨緣而現也。行上品十惡則現地獄界。行中品十惡則現畜生界。行下品十惡則現餓鬼界。行下品十善則現阿修羅界。行中品十善兼守五戒則現人界。行上品十善兼修禪定則現天界。修四

諦觀法則現聲聞界。修十二因緣觀法則現緣覺界。修六度萬行則現菩薩界。自覺覺他覺行圓滿則現佛界也。復次一切諸法卽空卽假卽中。所謂三諦是也。所言空者一切諸法因緣所生。旣是因緣所生。所以卽無自性。無自性故。卽名爲空矣。所言假者一切諸法雖無自性。然因緣合時。則宛然而有。故名爲假。假者假有之謂也。所言中者一切諸法雖無有自性。而宛然假有。雖宛然假有。而當體全空。非空非有。亦空亦有。是名中道矣。此三隔歷卽是次第三諦。隔歷者三諦不互融也。次第者前空次假後中也。三一無礙卽是圓融三諦。圓融者謂空不離假中。假不離空中。中不離空。

假舉一卽三。全三是一。三諦而一諦。一諦而三諦。不經前後次第。故名圓融也。以上所說卽本宗精要教理之略說者也。

四觀行者。復分爲三。一者二十五方便。二者三止三觀。三者四種三昧也。二十五方便者。一具五緣。二訶五欲。三棄五蓋。四調五事。五行五法。具五緣者。一持戒清淨。然有三種行人持戒不同。一者若人未作佛弟子時。不造五逆。後遇良友。教受三歸五戒。爲佛弟子。若得出家。受沙彌十戒。次受具足戒。作比丘比丘尼。從受戒來。清淨護持。無所毀犯。如此修行。則可得禪定智慧矣。二衣食具足。內禁雖嚴。必資衣食。衣以蔽形。食以支命。然須知量知足。若過貪。

求積聚。則心亂妨道。三閒居靜處。不作衆事。名之爲閒。無憤鬧。故名之爲靜。有三處可修禪定。一者深山絕人之處。二者頭陀蘭若之處。離於聚落。極近三四里。此則無諸憤鬧。三者遠白衣住處。清淨伽蘭之中。皆名閒居靜處。四息諸緣務。有四意。一息治生緣務。不作有爲事業。二息人間緣務。不追尋俗人朋友親戚。斷絕人事。往還。三息工巧技術緣務。不作世間工匠技術等事。四息學問緣務。讀誦聽學等。悉皆棄捨。此爲息諸緣務。所以者何。若多緣務。則行道事廢。心亂難攝。五近善知識。善知識有三。一外護善知識。經營供養。善能將護行人。不相惱亂。二者同行善知識。共修一道。互

相勸發。不相擾亂。三者。教授善知識。以內外方便禪定法門。示教利喜。訶五欲者。一訶色欲。謂男女形貌莊嚴。修目長眉。朱唇素齒。及世間寶物。青黃赤白。紅紫縹綠。種種妙色。能令愚人見則生愛。作諸惡業。二訶聲欲。謂箏篴篥笛。絲竹金石音樂之聲。及男女歌詠讚誦等聲。能令凡夫聞卽染著。起諸惡業。三訶香欲。謂男女身香。世間飲食馨香。及一切薰香等。愚人不了香相。聞卽愛著。開結使門。四訶味欲。謂苦酸甘辛鹹淡等。種種飲食。肴膳美味。能令凡夫心生染著。起不善業。五訶觸欲。男女身分。柔軟細滑。寒時體溫。熱時體涼。及諸好觸。愚人無智。爲之沈沒。起障道業。摩訶衍論云。

哀哉衆生。常爲五欲所惱。而猶求之不已。此五欲者。得之轉劇。如火益薪。其燄轉熾。世人愚惑。貪著五欲。至死不捨。後受無量苦惱。一切衆生。常爲五欲所使。名欲奴僕。坐此弊欲。沈墮三塗。此爲大賊。急當遠之。棄五蓋者。一棄貪欲。蓋前說外五塵中生欲。今約內意根中生欲。謂行者端坐修禪。心生欲覺。念念相續。覆蓋善心。令不生長。覺已應棄。所以者何。貪欲爲惱亂之住處。若心著貪欲。則無由近道。二棄瞋恚。蓋瞋是失佛法之根本。墮惡道之因緣。法樂之冤家。善心之大賊。瞋恚覆心。故名爲蓋。當急棄之。無令增長。三棄睡眠。蓋內心昏闇。名爲睡。支節委臥。睡熟爲眠。以是因緣。名爲

睡眠。此是惡法。最爲不善。行者應警覺無常。滅損睡眠。令無昏覆。四棄掉悔。蓋掉有三種。一者身掉。身好遊走。二者口掉。好喜吟咏。競爭是非。無益戲論。世間語言等。三者心掉。心情放逸。縱意攀緣。思惟世間才技。諸惡覺觀等。名爲心掉。悔者。悔能成蓋。若掉無悔。則不成蓋。何以故。掉時未在緣中。故後欲入定時。方悔前所作。憂心惱覆。故名爲蓋。但悔有二種。一者因掉後生悔。如前所說。二者如作大重罪人。常懷怖畏。悔箭入心。堅不可拔。五棄疑蓋者。以疑覆心。故於諸法中。不得信心。信心無故。於佛法中空無所獲。疑者有三種。一者疑自。而作是念。我諸根闇鈍。罪垢深重。非其人乎。自



作此疑。定法終不得發。若欲修定。勿當自輕。以宿世善根難測。故二者疑師。彼人威儀相貌如是。自尙無道。何能教我。三疑法。世人多執本心。於所受法。不能卽信。敬心受行。佛法之中。信爲能入。若無信者。雖在佛法。終無所獲。覺知疑過。當急棄之。

調五事者。一者調食。夫食之爲法。本欲資身。食若過飽。則氣急身滿。坐念不安。若食過少。則身羸心懸。意慮不固。此二皆非得定之道。須深慎之。二調睡眠。夫眠是無明惑覆。不可縱之。若其眠寐過多。非唯廢修聖法。亦復喪失功夫。而能令心闇昧。善根沈沒。當覺悟無常。調伏睡眠。三調身。四調息。五調心。此三應合用。不得別說。

但有初中後方法不同。是則入住出相有異也。夫調身者。行人欲入三昧。須善安身得所。初至繩牀。卽須先安坐處。每令安穩。次當正脚。若半跏坐。以左脚置右脚上。牽來近身。令左脚指與右脛齊。右脚指與左脛齊。若欲全跏。卽正右脚置左脚上。次解寬衣帶。不令坐時脫落。次當安手。以左手掌置右手上。次當正身。先當挺動其身。并諸支節。作七八反。如是已。則端直。令脊勿曲。勿聳。次正頭頸。令鼻與臍相對。不偏不斜。不低不昂。平面正住。次當口吐濁氣。吐氣之法。開口放氣。不可令粗急。以之綿綿恣氣而出。想身分中百脈不通處。放息隨氣而出。然後閉口。鼻納清氣。如是至三。次當

閉口。唇齒才相柱著。舌向上齶。次當閉眼。才令斷外光而已。端身正坐。猶如奠石。無得身首四肢切爾搖動。是爲初入禪定調身之法。調息法者。息有四種相。一風。二喘。三氣。四息。前三爲不調相。後一爲調相。云何爲風相。坐時則鼻中息出入覺有聲。是風也。云何喘相。坐時息雖無聲。而出入結滯不通。是喘相也。云何氣相。坐時息雖無聲。亦不結滯。而出入不細。是氣相也。云何息相。不聲不結不粗。出入綿綿。若存若亡。資神安穩。情抱悅豫。此是息相也。守風則散。守喘則結。守氣則勞。守息卽定。坐時有風喘氣三相。是名不調。若欲調之。當依三法。一者下著安心。二者寬放身體。三者想氣。

徧毛孔出入。通同無障。若細其心。令息微微然。息調則衆患不生。其心易定。是名行者初入定時調息方法。調心者有三義。一入二住三出。初入中調心者有二義。一者調伏亂想。不令越逸。二者常令沈浮寬急得所。何等爲沈相。若坐時心中昏暗。無所記錄。頭好低垂。是名沈相。爾時當繫念鼻端。令心住在緣中。無分散意。此可治沈。何等爲浮相。若坐時心好飄動。身亦不安。念外異緣。此是浮相。爾時宜安心向下。繫緣臍中。制諸亂念。心卽定住。則心易安靜。舉要言之。不沈不浮。是心調相。二住坐中調心者。行人當於一坐之時。隨時長短。令一坐之中。身息及心三事調適。無相乖越。和融。

不二。此則能除宿患。妨障不生。定道可尅。三出時調心者。行人若坐禪將竟。欲出定時。應前放心。異緣開口放氣。想從百脈隨意而散。然後微微動身。次動肩膊及手頭頸。次動二足。悉令柔輒。次以手徧摩諸毛孔。次摩手令煖。以揜兩眼。然後開之。待身熱稍歇。方可隨意出入。若不爾者。坐或得住。心出既頓促。則細法未散。住在身中。令人頭痛。百骨節彊。猶如風勞。於後坐中煩躁不安。是故心欲出定。每須在意。此爲出定之法。行五法者。一者欲。欲離世間一切妄想顛倒。欲得一切諸禪智慧法門。故名爲欲。如佛言曰。一切善法。欲爲其本。二者精進。堅持禁戒。棄於五蓋。初夜後夜。專精不

廢譬如鑽火。未熟終不休息。是名精進。三者念念世間爲欺誑可賤。念禪定爲尊重可貴。若得禪定。卽能發無漏智。及一切神通。成等正覺。廣度衆生。是爲可貴。故名爲念。四者巧慧。籌量世間樂禪定。智樂得失輕重。所以者何。世間之樂。樂少苦多。虛誑不實。是失是輕。禪定智慧之樂。無漏無爲。寂然閒曠。永離生死。與苦長別。是得是重。如是分別。故名巧慧。五者一心。分明明見世間可患可惡。善識定慧功德可尊可貴。爾時應當一心決定。修行止觀。心如金剛。天魔外道不能沮壞。是名一心。以上所說。卽二十五種方便也。三止三觀者。初明三止。次明三觀。言三止者。一體真止。謂體達無

明顛倒之妄。卽是實相之眞。是名體眞止。二方便隨緣止。方便猶善巧也。謂隨緣歷境安心不動。是名方便隨緣止。三離二邊分別止。謂不分別生死涅槃有無等二邊之相。是名離二邊分別止。三觀者。空觀假觀中觀也。空者。離性離相之謂也。謂觀一念之心不在內。不在外。不在中間。名之爲空。一空則一切皆空。卽是空諦。假者。無法不備之謂也。謂觀一念之心。具足一切諸法。名之爲假。一假則一切皆假。卽是假諦。中者。卽中正。絕二邊對待之謂也。謂觀一念之心。非空非假。卽空卽假。名之爲中。一中則一切皆中。卽是中諦。初之止觀能斷見思惑。次之止觀能斷塵沙惑。後之止觀能

斷無明惑。見思惑者。意根對於法塵而起。分別曰見惑。眼等五根對於色等五塵而起。貪瞋等曰思惑。塵沙惑者。此就所化之衆生而得名。謂衆生見思惑數多如塵沙。菩薩之行專爲化他。故須通達如塵如沙之無量法門。方能應病與藥。若劣慧不知。則必障乎化導。故名此劣慧爲塵沙惑。無明惑者。卽障中道實相理之別惑也。此三惑元爲同體約麤中細之義。用分爲三種耳。不了空諦理。則起見思惑。不了假諦理。則起塵沙惑。不了中諦理。則起無明惑。故卽以空假中三觀破此三惑。三惑破則三智可證。而三德可成矣。三智者。一者一切智。謂佛法所詮之一切法相及名字。能知能



解。外道所詮之一切法相及名字。亦能知能解也。二者道種智。謂能用諸佛一切道法。發起衆生一切道種也。三者一切種智。謂能以一種智。而知一切諸佛之道法。及一切衆生之因種也。三德者。一者法身德。法名可軌。諸佛軌之而得成佛。身者聚也。此之法身。在諸佛不增。在衆生不減。衆生迷之而成顛倒。諸佛悟之而得自在。具足常樂我淨。是名法身德。常卽不遷。不變。樂卽安隱寂滅。我卽自在無礙。淨卽離垢無染也。二者般若德。梵語般若。華言智慧。謂佛究竟始覺之智。而能覺了諸法不生不滅清淨無相平等不二。具足常樂我淨。是名般若德。三者解脫德。不繫名解。自在名脫。

謂佛永離一切業累之縛。得大自在。具足常樂我淨。是名解脫德也。四種三昧者。欲登妙位。非行不階。行法雖多。略言其四。梵語三昧。華言正定。一常坐三昧。常坐三昧者。亦名一行三昧。文殊般若經。以九十日爲期。獨居靜室。跏趺正坐。蠲除惡覺。捨諸亂想。不雜思惟。繫緣法界。若坐疲極。或疾病所困。或睡蓋所覆。或宿障發動。不能遣却。當專稱一佛名號。以求加護。除經行飲食便利之外。時刻相續。無須臾廢。此之三昧。於一期中。若能精勤不懈。念念無間。則能破除障業。而證實相之理矣。二常行三昧。常行三昧者。亦名般舟三昧。梵語般舟。華言佛立。佛立有三義。一佛威力。二三昧力。

三行者本功德力。能於定中見十方佛在其前立。故名佛立。以九十日爲期。終竟三月。身常旋行。不得休息。口常唱阿彌陀佛。心常想阿彌陀佛。或先想後唱。或先唱後想。想唱相繼。無令休息。此之三昧極能斷除宿障。於諸功德最爲第一。三半行半坐三昧。半行半坐三昧者。若依方等經。七日爲期。唯誦密咒。旋百二十匝。一旋一咒。不遲不疾。不高不下。旋竟却坐。思維實相之理。思維之後。更起旋咒。周而復始。若依法華經。三七日爲期。但誦本經。故經云。其人若行若立。讀誦是經。若坐思惟是經。我乘六牙白象現其人前。此等三昧。俱是半行半坐也。四非行非坐三昧。非行非坐三昧者。

前之二種俱用行坐。今言非行非坐。雖非行坐。實通行坐。亦名隨  
自意三昧。謂但於一切時中一切事上。隨意修習上述之各種法  
門。不拘限期是也。

五行位者。所謂六卽佛之說是也。六卽佛者。約事故明。六約理故  
明。卽者。其體不二。名之爲卽。然明此六卽者。或顯法門高深。或  
明修行次第。若論六者。位次高下有序。則修行之人。不生上慢。若  
論卽者。理體初後皆是。則修行之人。不生退屈。以理言之。卽處常  
六。六處常卽。蓋由事理不二故也。一理卽佛。謂衆生本具佛性之  
理。與諸如來無二無別。故涅槃經云。一切衆生卽是佛。是爲理卽。

佛。二名字卽佛。謂或從知識處聞。或從經卷中見。知此理性卽佛之名。於名字中。通達解了一切諸法皆是佛法。是爲名字卽佛。三觀行卽佛。謂既知一切法皆是佛法。必須心觀明了。理慧相應。所行如所言。所言如所行。是爲觀行卽佛。此五品位也。

五品者。隨喜品。讀誦品。說法品。兼行六度品。正行六度品也。四相似卽佛。謂於觀行卽中。愈觀愈明。愈止愈寂。雖未能真證其理。而於理彷彿。有如真證。是相似卽佛。此十信位也。

十信位者。信心。念心。精進心。慧心。定心。不退心。護法心。回向心。戒心。願心也。五分證卽佛。謂無明之惑有四十一品。至此破一品無

明證一分中道。是爲分證卽佛。此十住十行十回向十地等覺位也。

十住者。發心住。治地住。修行住。生貴住。方便具足住。正心住。不退住。童真住。法王子住。灌頂住也。十行者。歡喜行。饒益行。無瞋恨行。無盡行。離癡亂行。善現行。無著行。尊重行。善法行。眞實行也。十回向者。救一切衆生。離衆生相。回向。不壞回向。等一切佛回向。至一切處回向。無盡功德藏回向。隨順平等善根回向。隨順等觀一切衆生回向。眞如相回向。無礙解脫回向。法界無量回向也。十地者。歡喜地。離垢地。發光地。焰慧地。難勝地。現前地。遠行地。不動地。善

慧地。法雲地也。等覺者。去後妙覺佛位。猶有一等。勝前諸位。得稱覺也。六究竟卽佛。謂道窮妙覺。種智俱圓。是爲究竟卽佛。此極果妙覺佛也。種智者。卽一切種智也。妙覺者。覺體圓明。不可思議也。六身土者。謂三身四土也。三身者。一者法身。法名可軌。諸佛軌之。而得成佛。以法爲身。故名法身。二者報身。修因應果。名之爲報。然有自報他報之別。自報卽理智如如。他報卽相好無盡。是名報身。三者應身。智與體冥。能起大用。隨機普現。說法利生。故名應身也。四土者。一同居士。具云凡聖同居土。凡夫與聖者雜居之土也。此有淨穢之別。如娑婆世界者。卽同居之穢土。西方極樂世界卽同

居之淨土也。二方便土。具云方便有餘土。二乘三賢等所居者也。此三界以外之淨土也。生此土者。雖有變易生死。然分段生死則無之矣。三實報土。具云實報無障礙土。此土純是菩薩所居。無有二乘。蓋以菩薩行真實法。故能感得如斯之殊勝果報也。四寂光土。具云常寂光土。此是全斷無明。永離分段變易二種生死之究竟果佛所居者也。常卽法身。寂卽解脫。光卽般若也。天台宗之教義。茲已略說。若欲詳知。須讀法華經玄義。法華經文句。及摩訶止觀等書。

(完)



佛學小叢書

初機佛學津梁  
佛學小叢書

第一輯 ◆ 全十五種 ◆ 定價二元

- |              |             |            |           |           |          |         |
|--------------|-------------|------------|-----------|-----------|----------|---------|
| 觀彌勒上生兜率陀天經講要 | 從世界危機說到佛教救濟 | 佛學在今後人世之意義 | 佛法萬能中之科學化 | 反宗教聲中之佛教辨 | 釋迦佛應世的始末 | 現代僧伽的職志 |
| 居家士女學佛程序     | 日本刑政與佛教     | 觀心十法界圖說    | 中國危機之救濟   | 觀音菩薩典要    | 地藏大士聖蹟   | 蓮宗九祖略傳  |
| 在家學佛法要       | 白尊者開示錄      | 念佛四十八法     | 貫通諸法大意    | 六波羅蜜法門    | 布施波羅蜜    | 持戒波羅蜜   |
| 淨業津梁         | 淨土問辨        | 文殊師利       | 佛像概說      | 佛典略說      | 五戒心法     | 大乘宗要    |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 破除迷信    |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 佛法談天    |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 佛法談地    |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 世界成壞    |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 談空篇     |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 唯識學     |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 淨土篇     |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 釋尊傳     |
| 淨土問辨         | 文殊師利        | 佛像概說       | 佛典略說      | 五戒心法      | 大乘宗要     | 外道      |

佛學小叢書

天台宗教義略說

全一冊

中華民國二十四年十月初版

◎每冊定價大洋四分(外埠酌加郵費)

著述者 梅光義

出版者 佛學書局 代裝 沈彬翰

印刷者 國光印書局  
上海新大沽路 電話三三七四三

總發行所 上海佛學書局  
愚園路一五四號 電話三五五二四

分發行所 佛學書局分局

上海參特赫司脫路  
上海山東路有正書局  
長沙玉泉街七十號  
杭州西湖龍翔橋  
福州下南路廿四號

分銷處 各埠佛經流通處

2

487578

